

門 74
號 6396
卷 2

古香齋寶袖珍春明夢餘錄卷之七

北平孫承澤著

正殿

奉天殿洪武鼎建初名也累朝相沿至嘉靖四十一年改
名皇極殿制九間中為寶座座旁列鎮器座前為簾簾以
銅為絲黃繩繫之簾下為壇壇盡處設樂殿兩壁列大龍
櫺八相傳中貯三代鼎彝櫺上皆大理石屏每遇正旦冬
至聖節則御焉前一日尚寶司設寶案於奉天殿寶座之
東鴻臚寺設表案二於殿東中門外禮部主客司設藩國

早稻田大學圖書館
昭和25.11.7
購 朱

百方物案八於丹陛中道左右欽天監設定時鼓於文樓之上教坊司設中和韶樂於奉天殿內東西設大樂於奉天門內東西俱北向至期錦衣衛陳鹵簿儀仗於丹陛及丹墀東西設羽扇於殿內東西陳車輅步輦於奉天門丹墀中道北向金吾等衛列甲士軍仗於午門外奉天門外及丹墀東西旗手衛設金鼓於午門外列旗幟於奉天門外御馬監設仗馬錦衣衛設馴象於文武樓南東西相向欽天監設報時位於丹陛之東鼓初嚴百官具朝服齊班于午門外鼓次嚴引班官引百官并進表人員及四夷人

等次第由左右掖門入詣丹墀序立欽天監雜唱官司晨一員於文樓下西向錦衣衛將軍六員於殿內之南北向將軍四員於丹陛四隅東西相向其餘侍衛將軍各分立於殿陛等處如儀鳴鞭四人於丹墀中道左右北向金吾等衛護衛官二十四員於丹陛之南六員於丹墀之北俱東西相向陳設方物鴻臚寺司賓署丞一員撤方物案鴻臚寺序班十六員於丹陛中道左右外贊鴻臚寺鳴贊等官十二員於丹陛及丹墀東西糾儀御史十二員於丹墀之東西殿前侍班錦衣衛千戶六員光祿寺署官四員序

班二員傳呼鳴鞭錦衣衛百戶四員俱於殿中門外東西相向導表六科都給事二員序班二員於表案左右掌領侍衛官三員於殿內東西相向錦衣衛正直指揮一員於簾石東向百戶二員於簾下左右相向捲簾畢卽趨出殿門外各豫立以俟鼓三嚴執事禮部堂上官并內贊鳴贊一員陳設表案并舉案序班五員典儀鴻臚寺司儀署丞一員捧表禮部儀制司四員展表六部都察院通政司大理寺堂上官二員宣表致詞并傳制等項鴻臚寺堂上官五員捧寶尚寶司官二員導駕六科給事中十員殿內侍

班翰林院官四員中書官四員糾儀御史四員序班二員及各遣祭官俱詣華蓋殿外候上具發冕陞座鐘聲止入序立遣祭官以次復命訖各趨入丹墀班禮部堂上官跪奏方物并請上位看馬候得旨復位鴻臚寺卿跪奏執事官行禮贊拜叩頭畢贊各供事鴻臚寺卿跪請陞殿駕興導駕官前導尚寶司官捧寶前行樂作上御奉天殿導駕官立於殿內柱下東西相向侍班翰林院立於東導駕官之後中書官立於西導駕官之後糾儀御史序班分立於侍班官之下尚寶官置寶于案分立於導駕官之上樂止

鳴鞭報時雞唱訖外贊唱排班班齊鞠躬大樂作四拜興
平身樂止內贊贊進表大樂作導表官導表案至殿東中
門止序班舉案入置殿中退立於東西柱下樂止贊宣表
目禮部堂上官并宣表目官詣殿中跪宣畢各叩頭退贊
宣表展表官取表同宣表官詣殿中跪外贊贊跪眾官皆
跪宣畢展表官分東西先退內外皆贊俯伏大樂作與平
身樂止宣表官退序班舉案置殿東外贊贊跪眾官皆跪
代致詞官跪於丹陛中道致詞同賀訖外贊贊俯伏眾官
皆俯伏大樂作四拜興平身樂止傳制官詣御前跪奏傳

制俯伏興由東門靠東出至丹陛之東西向立稱有制外
贊贊跪眾官皆跪宣制制與洪武間所定同宣訖外贊贊
俯伏大樂作與平身樂止贊贊鞠躬三舞蹈贊跪唱山
呼百官拱手加額曰萬歲唱山呼曰萬歲唱再山呼曰萬
萬歲贊出笏俯伏大樂作四拜興平身樂止鴻臚卿詣御
前跪奏禮畢鳴鞭樂作駕興尚寶官捧寶導駕官前導至
華蓋殿樂止駕還宮

朝制

古天子有內朝有外朝如文華殿所謂內朝也奉天

殿所謂外朝也外朝古在應門之外人君不常御國
 家有大典禮則於此朝會而朝士掌其法有大疑難
 則於此詢事而小司寇掌其政朝士掌建邦外朝之
 法左九棘孤卿大夫位焉羣士在其後右九棘公侯
 伯子男位焉羣吏在其後而三槐三公位焉州長衆
 庶在其後左嘉石平罷民焉右肺石平窮民焉又小
 司寇之職掌外朝之政以致萬民而詢焉
 漢唐宋有大朝常朝如御正殿所謂大朝也如御門
 所謂常朝也漢以十月朔為元旦行饗禮二千石以

上上殿稱壽唐以元旦千秋節合元殿受朝賀宋以
 元旦五月朔冬至千秋節行大朝會于文德殿此所
 謂大朝也漢宣帝五日一朝唐以宣政殿為前朝謂
 之正衙日見羣臣謂之常參以紫宸為便殿謂之入
 閣宋于垂拱日見侍從官謂之常參于紫宸五日一
 朝謂之六參朔望一朝謂之朔參望參此所謂常朝
 也

元世祖至元十一年正旦始御大明殿受朝賀及後
 天壽節皆行朝賀禮每日則宰執入延春閣及別殿

奏事而已

元大朝殿上設漏案香案酒海殿明外中道設褥位丹陛中道設鳴鞭丹陛中道設香案又設表案禮物案中道南東西設樂位設內黃麾立仗設外牙門立仗又酒海之前一人手執玉鉞立於陛下鉞乃殷時之物長三尺有奇廣半之通體花紋宋藏宣和殿中爲金所得後歸元以爲大寶其服制祀天則服大裘而加袞正旦聖節則常衣不被袞冕惟祀宗廟則服之內庭大宴則服質孫質孫者華言一色服也其臣

下朝會之服則用唐宋公服一品紫玉帶二品紫犀帶三品四品紫金帶五品紫角帶六品七品緋角帶八品九品綠角帶其京官賜宴則有質孫其制冬之服凡九等大紅納石失大紅怯綿里大紅官素一桃紅藍綠官素各一紫黃鴉青各一納石失者金錦也怯綿里者剪茸也章服

大朝上服袞冕元衣纁裳冠制嘉靖八年定冠制以圓匡烏紗冒之冠上有覆板長一尺四寸廣一尺二

寸元表朱裏前圓後方前後各七采球玉十二旒以黃赤青白黑紅玉爲之玉珩玉簪導朱纓青纁充耳綴以玉珠二凡尺皆以周尺爲度衣元色凡織六章日月在肩各徑五寸星山在後龍華蟲在兩袖長不掩裳之六章裳黃色爲幅七前三幅後四幅連屬如帷凡繡六章分作四行火宗彝藻爲二行米黼黻爲二行中單素紗爲之青綠領織黻文十二蔽膝隨裳色羅爲之上繡龍一繡火二係於革帶大帶素表朱裏上緣以朱下以綠不用錦革帶前用玉其後無

玉以佩綬繫而掩之朱襪赤舄黃絲緣元纓結圭白玉爲之長尺二寸刻其上下以黃綺之上刻山形四盛以黃綺囊藉以黃錦凡朔望視朝降詔降香進表四夷朝貢朝覲則服皮弁服用黑紗冒之前後各十二縫其中各綴五采玉十二縫及冠武弁貫簪繫纓處皆飾以金玉簪朱紘纓玉以赤白青黃黑相次玉圭長如冕服之圭有脊并雙植文刻其上黃綺約其下及有韜金龍文絳紗袍本色領標襪紅裳如冕服內裳制但不識章數

中單以青紗爲之如深衣制紅領標襪裙領織黻文
十二蔽膝隨裳色本色緣以玉鈎二玉佩大帶大綬
襪膝俱如冕服內制
鹵簿

大朝儀制殿內左右扇三重內雙龍扇二十外素扇
二十二又外素扇二十殿門左右黃曲蓋繖二次左
金交椅一金脚踏一次左金盆一右金確一此外爲
丹陛左右仗三重內雙龍扇二十次單龍扇二十外
金節六次嚮節二十六次領頭二又外左朱雀旗一

右元武旗一次骨朵六次金鉞六次金鐙六次臥瓜
六次立瓜六次儀刀六次吾杖六次班劍六次龍戟
六次班戟六次左青龍旗一右白虎旗一次領頭二
中道左右雙龍扇內紅花繖二次黃蓋繖二次紅方
繖二次單龍扇內設大樂之所此外爲丹陛左右仗
三重內黃蓋繖二次紅繡繖二次紅花蓋繖二次紅
曲蓋繖二次紅花繖二次紅曲蓋繖二次紅方繖二
次紫方繖四次雉扇十次紅花扇十六外羽葆幢十
次豹尾四次龍頭竿十次信幡十次傳教幡十次告

止旛十次降引旛十次黃麾二又外戟警二十次戈
警二十次儀鎧二十凡三重皆有領頭各一中道右
黃蓋繖內馬兀一雉扇內左爲玉輅右爲大輅玉輅
前爲步輦大輅前爲硃紅輦戟警外左右設馬二十
四仗下左右鳴鞭各三馴象各三此立仗之儀也至
于出行鹵簿大略同前稍引而長之

鹵簿之制兆于秦而其名則始于漢或曰鹵者大盾
也以大盾領一部之人故曰鹵部或曰凡兵衛以甲
盾居外爲導從捍蔽其先後皆著之簿籍故曰鹵簿

按三輔黃圖天子出車駕次第謂之鹵簿而唐制四
品以上皆給鹵簿則鹵簿者君臣皆得通稱也五代
之亂圖典失墜宋王欽若爲鹵簿記宋綬蔡攸等因
之而其制始詳元曾巽申復爲鹵簿圖雖間有增損
而俱無大異國朝嘗詔禮官鹵簿彌文務從省節蓋
尚質去奢之意也

元人袁學士有鹵簿詩黃文獻潛跋曰昔我世祖皇
帝肇造大室武宗皇帝始親裸獻逮英宗皇帝乃行
時享之禮而脩鹵簿之儀蓋天下極盛之際也翰林

直學士致仕袁公時為秘書監著作郎寫以為詩使窮鄉下士一覽觀焉如身在輦轂之下而觀熙朝之彌文何其幸與漢應劭唐王象皆有鹵簿圖宋王欽若有鹵簿記三卷宋綬增為七卷後累增為三十三卷公乃括以六百言曲盡其鋪張之妙亦奇矣詩曰雖無老成人尚有典刑安可忽諸御樂

大朝會用樂工六十四人引樂二人簫四人笙四人琵琶六人箏篥四人箏六人方響四人頭管四人龍

笛四人杖鼓二十四人大鼓二人板二人戴曲脚幞頭衣紅羅生色畫花大袖衫塗金束帶紅羅擁項紅結子皂皮靴每朝賀之日和聲郎預先陳樂於丹墀百官拜位之南北向伺上位將出仗動和聲郎舉麾唱曰奏飛龍引之曲上位陞座樂止偃麾贊禮唱鞠躬和聲郎唱曰奏風雲會之曲樂作百官拜畢樂止國公陞殿和聲郎唱曰奏慶皇都之樂樂作國公出殿門復位樂止贊禮唱鞠躬和聲郎唱曰奏喜昇平之樂樂作百官拜畢樂止伺上位興和聲郎唱曰奏

賀聖明之樂樂作上位還宮樂止百官捲班和聲耶引樂工以次出

朝服

羣臣朝服一品七梁冠衣赤色白紗中單俱用皂領飾緣赤羅裳皂緣赤羅蔽膝大帶用白赤二色革帶用玉鈎釧白襪黑履錦綬上用綠黃赤紫四色絲織成雲鳳四色花樣青絲網小綬二玉環一功臣一品皆加籠巾貂蟬一品六梁冠衣裳中單蔽膝大帶鞞履同上革帶用犀鈎釧其錦綬同一品小綬犀環各二三品五梁

冠衣裳中單蔽膝大帶襪履同上革帶用金鈎釧其錦綬用綠黃赤紫四色織成雲鶴花樣青絲網小綬二金環二四品四梁冠衣裳中單蔽膝大帶襪履同上革帶用金鈎釧其錦綬同三品小綬二金環二五品三梁冠衣裳中單蔽膝大帶襪履同上革帶用鍍金鈎釧其錦綬用綠黃赤紫四色織成盤雕花樣青絲網小綬二銀環二六品七品二梁冠衣裳中單蔽膝大帶同上革帶用銀鈎釧其錦綬用綠黃赤三色絲織成練鵲花樣青絲網小綬二銀環二八品九品

一梁冠衣裳中單蔽膝大帶襪履同上其革帶用銅鈎鑠錦綬黃綠二色絲織成鷓鴣花樣青絲網小綬
二銅環二至朔望朝見則用公服一品服赤色大獨科花直徑五寸玉帶二品服赤色小獨科花直徑三寸花犀帶三品服赤色散荅花直徑二寸金帶鏤葵花一蟬八四品五品服赤色小雜花直徑一寸五分金帶鏤四品葵花一蟬六五品葵花一蟬四六品七品服赤小雜花直徑一寸光素銀帶六品鍍金葵花一蟬三七品光素銀帶鍍金葵花一蟬二八品九品

服赤無花通用光素銀帶其笏五品以上用象牙九品以上用槐木其幘頭鞞並依舊制
班次

文武官班次文官齊班位於午門外之東西向以北爲上武官齊班位於午門外之西東向以北爲上午門西偏門入奉天門西偏門文官起居位於文樓丹墀之南北上西向殿前班位於武官起居位之北北上東向侍從班起居位於文官起居位之北北上西向文官一品二品拜位於內道上之東每等異位重

行北面西上武官一品二品拜位於內道上之西每等異位重行北面東上文官三品以下拜於丹墀內道下之東每等異位重行北面西上武官三品以下拜於丹墀內道下之西每等異位重行北面東上分文武官爲十八位第一班正一品第二班從一品第三班正二品第四班從二品第五班正三品第六班從三品第七班正四品第八班從四品第九班正五品第十班從五品第十一班正六品第十二班從六品第十三班正七品第十四班從七品第十五班正

八品第十六班從八品第十七班正九品第十八班從九品使客位文官之東此初制也惟以品定班次其後稍爲變易勳臣在西上面東不與百官齒左班面西侍立一品二品爲第一行三品次之爲第二四品五品京堂次之爲第三宮坊五品六品次之爲第四翰林六品七品次之爲第五兩房中書次之爲第六此爲一段其下六科爲第一吏部第二中書舍人第三此爲一段其下則御史第一五部次之自此以下品級官制紊不可紀矣右班面東侍則錦衣在前

五軍都督府次之其後七十二衛指揮等官其北面
行禮班次則公侯駙馬伯列三班於前去文武階次
稍遠其下則文武兩班同上御道左右分立一品二
品爲第一三品第二四品五品京堂至翰林史官庶
吉士第三科道中書第四其下則六部郎官亦頗紊
亂其同班序立翰林七品在小九卿六品之上官坊
六品在小九卿五品之上官坊五品在大九卿五品
之上講讀學士在大九卿四品之上惟讓僉都少詹
學士在僉都之上至于六部郎官往時或叙衙門一

吏二禮其下則戶兵等部右班武臣當以都督爲先
自嘉靖以來錦衣權重又陸朱諸公皆三公重銜官
在都督之上故立于首萬曆戊寅朱太傅已沒掌錦
衣者俱都指揮等官相沿舊規仍立前列其後遂有
爭議部中以錦衣貴重竟不能持可否乃令錦衣仍
前立行稍下都督立其後稍上非正禮也
古時五等之爵原有等級如唐爵國公一品郡縣公
二品侯三品伯四品子男五品至宋略倣其制後則
公侯伯三等皆在一品之上不與文武齒矣弘治中

主事林沂奏欲按品秩列坐御史上御史劾之曰朝廷設官分秩有拘品秩者有不拘品秩者故慶成賜宴科道坐于郎中之上翰林坐于科道之前若概以品秩則諸學士當列于少卿之下京縣知縣兵馬司當列于御史給事中之上矣上以沂故違成憲治之看馬

大朝畢上暫退至謹身殿更便服於殿外丹陛上設幄羣臣盛服侍班御馬監之馬雲錦成羣每一馬各有名牌壯士控之由東過西最爲盛觀其制始于嘉

靖中至後久不舉行崇禎壬申十一月初十日冬至郊祀十一日百官八賀朝畢復一閱視是日閱馬三百三十三匹

賜宴

每歲三大朝賀及郊祀禮成行慶賀禮俱賜宴又臣四品以上及諸學士武臣都督以上皆宴殿上經筵官及翰林講讀官尚寶司卿六科都給事中暨文臣五品堂上官武臣都指揮以上官宴中左中右門翰林院中書舍人左右春坊御史欽天監太醫院鴻臚

寺官及五品以上官宴于丹墀是日行禮畢該宴官
更衣立殿外候上至升堂樂作入拜進花進酒跪候
上飲訖乃起卽席簪花啐酒酒凡九進湯五進羣臣
則殺其二會之時拱衛司于殿庭設黃麾仗及擎執
如奉天殿之儀和聲郎列樂于殿上之南間作大樂
細樂酒七行食遍凡行酒初行奏大樂作太清曲次
行細樂奏感皇恩曲五行舞諸國來朝隊六行細樂
奏朝天子曲七行舞長生隊細樂奏醉太平曲凡進
食則作大樂

音樂莫盛于唐有太常雅樂二部堂上立奏謂之立
部堂下坐奏謂之坐部有鼓吹署令所掌饒歌鼓吹
曲有龜茲疏勒高昌天竺諸部謂之胡樂有教坊梨
園法曲有雜樂雜戲又有山車陸般馬犀象及宮人
所舞奏霓裳羽衣之曲每大酺賜宴以次陳奏卽漢
武角觝魚龍之戲也高宗因立太子勅宴百官命散
樂自宣政入太常博士袁利貞請罷散樂甚爲知禮
大殿宴會用舞隊乃相沿元人陋習宜製盛世君臣
相悅之樂以彰一代之盛

賜宴之日其官卑祿薄者免宴賜以鈔謂之節鈔
大宴之外如遇太后聖誕太子千秋壽麵及立春日
春餅元宵圓子四月初八日佛誕日用不落莢端午
涼糕糉子重陽糕臘八日麵俱先期奏請至日早朝
畢復奏百官隨一拜三叩頭起宴畢復一拜三叩頭
而出嘉靖十四年四月上諭夏言曰內殿禮儀四月
八日俗事宜革其賜百官不落莢亦當改已復諭曰
禮記月令謂是日麥先熟薦寢廟今歲以孟夏之五
日薦麥內殿賜百官麥餅大學士張孚敬李時奏曰

不落莢者相沿釋氏之說於禮無據仰見皇上據經
析理得先王遺意遂著爲令查萬厯中光祿寺誌稱
四月初八日英華殿欽安殿用大不落莢二百對小
不落莢三百對紅棗一斤十二兩而乾清坤寧翊坤
等宮每宮大五十對小一百對各小宮大三十對小
五十對多人每不落莢四個皆以糯米粳米黑糖蜜
紅棗爲之則世廟所廢萬厯間似復行矣惟宴改爲
麥餅則在四月初五日於午門前宴百官有上桌中
桌二樣閣部單坐宮坊以下各雙坐

策士

殿前策士最稱重典會試後於三月十五日上陞殿百官公服行一拜三叩頭禮畢分班立禮部引中式舉人行五拜三叩頭禮各領題在殿前對策至晡而出其題內閣擬呈先一日召中書官于六科廊繕寫內璫監之是夜司禮監鐫刻三鼓始竣仍鐫中書于內至御殿始放出

宣德五年廷策諸士上臨軒發策畢退御武英殿賦策士歌以示諸讀卷官

弘治乙丑廷試上於宮中焚香籲天期得真才以資實用

嘉靖己丑廷試上閱諸卷於羅洪先卷批曰學正有見言讜而意必忠宜擢之首於程文德卷批曰探本之論於揚名卷批曰能守聖學以爲本此知要之說於唐順之卷批曰條論精詳殆盡於陳束卷批曰仁智之用本諸吾心此不易之說於任瀚卷批曰勉吾敬一之爲主忠哉羅洪先一代大儒上首拔之時稱得人乙未廷試上批韓應龍卷曰是題本意可第一

甲第一名批孫陞卷曰說仁禮之意好可第二名批
吳山卷曰敬爲心學之極此論好可第三名
崇禎戊辰廷試卷閣擬劉若宰第一莊應會次之上
翻駁再三竟用劉第一而抑莊爲二甲首其第二第
三皆特拔第三管紹寧策內誠字少一撇御書足之
因自號誠齋甲戌廷試閣擬李焜爲第一上在文華
殿翻閱初進十二卷項之閣臣趨出入閣再搜十二
卷以進特拔第二十二卷劉理順爲狀元而李焜爲
二甲首第二楊昌祚第三吳國華皆特拔也庚辰殿

試日上御輿張蓋下丹墀徧觀諸進士對策及十六
日呈進十七日上忽召四十人對文華殿遂拔順天
通州魏藻德第一鄆縣葛世振靜海高爾儼俱一甲
而復拔趙玉森姚宗衡劉瑄孫一脉嚴似祖爲簡討
命蔣德璟王錫衰教習之周鼎等爲科道吏部主事
有差至癸未廷試在九月十五日是年以兵事會試
改八月
廷試以三月十五日而十八日傳臚二十二日謝恩
賜狀元袍服故事上皆視殿自永陵之末元嘿不出

後遂以爲常至崇禎御極始照例陞殿并武舉亦如
文舉傳臚至于撤御膳賜閣臣如嘉靖之王成隆慶
之辛未萬曆之癸丑是時慈谿江陵福清三公皆受
主眷最隆故有殊典不多見也

蔣閣學德璟大殿侍班記崇禎帝以丁卯八月十四
日御皇極殿登極三殿自萬曆丁酉燬後久不臨御
鴻臚茫然儀注皆不知時詞臣侍班四人宜在皇極
殿內御簾外居東而鴻臚曰宜分東西於是詞臣分
二人亟奔而西出東弘政門復過西宣治門過武成

閣入中右門從西欄上至中極殿右門外而上已衰
冕御建極矣時魏忠賢任僞公良卿特奉旨遣南郊
還入奏上曰知道了其聲甚嚴又曰百官免賀免宣
表御座處其上結爲寶蓋光彩輝煌行五拜三叩頭
畢卽趨出右門循殿前而馳從皇極殿入迎駕上自
建極過中極出御皇極侍班官兩傍面駕一躬距上
咫尺卽侍立御簾下簾捲上從中徑上九級御座兩
傍柱皆金粧凡四柱當御座處其上亦皆金也御座
背及旁屏皆祖宗鐘罍云

崇禎壬午元旦上御大殿記崇禎十五年壬午元旦御大殿受賀鞭鳴鴻臚奏禮畢上降寶座秉圭中立命宣輔臣中使誤以爲宣府臣也五府勳臣至殿上乃令之下而曰宣閣臣閣臣周延儒等疾趨而至從西傍門入東向而跪上轉身西向長揖之諭曰朕以眇躬仰承天眷君主萬方十四載于茲矣深慚德行淺薄才識庸常恐忝君師之位思古來聖帝明王皆崇師道今日講稱先生猶存遺意卿等卽朕之師也股肱心膂臣哉隣哉經曰尊賢也敬大臣也禮應尊

敬朕此舉原不爲過敬于正月元日端冕而求諸先生不必謙遜今而後道德惟諸先生訓誨之政務惟諸先生匡贊之調和燮理奠安宗社萬民惟諸先生是賴古來君臣志同道合而天下治平朕于諸先生有深望焉特諭延儒等跪伏流涕滿面臣承澤適以戶科左給事中導駕侍班感堯舜之再見而愧臣工無以報塞也謹記

元旦頌聖詩四首闕門元日感咨疇五色榮光動冕旒一自丹書臨北面更無龍袞揖東頭天支大厦思

隆棟帝念巨川重濟舟泰運只憑新禮樂良臣何以
荅端求 黃虞曠典雜難倫復有賡揚到比隣不謂
保明初訪落還從尊帝得忱恂元穹監物垂垂定聖
主敦庸事事真幾代圖松當此禮光風穆雨四門賓
師臣者帝古尊賢况在宸居異講筵七聖道南通
大駟八能占應奉階前未須審象知惟肖不待颺風
賦有卷十四朝來無故事安昌古序憶當年 星辰
從此睹重華勸爾聞昌卽拜嘉縱賜千金猶有數雖
封百子又何加碧磚長照交龍影紗帽能添壓鬢花

新注起居人少見各傳銀管照家家

文昭閣傍立直房記崇禎十五年八月十七日早朝
畢卽登文昭閣閣在皇極殿之東卽文樓也上步下
閣御德政殿召對閣臣五人言國初弘文館在禁中
閣臣對弘文館國初設在思善門內上曰然文昭閣
兩旁亦可建直房朕不時召對及講讀偶有疑問先
生每往來亦便閣臣對宋人言親賢士大夫之時多
親宦官宮妾之時少臣等見皇上講學勤政真得堯
舜心法上問永樂大典及大學用人理財諸臣各有

奏對言用人理財俱明明德內事大學一書只是明
明德上首肯因言京中宜積貯本色德璟對外面各
處都宜積貯本色高皇帝原設有預備倉令直省州
縣專貯本色以待荒年之用今預備倉只是空名上
曰屯田也要緊因言漕運海運諸事黃河一帶修築
如何閣臣對近年自董家河起即用泇河不用黃河
一路較平穩上曰是泇河又言京中運糧車戶之苦
閣臣對車戶脚價原有輕齋銀可用只須給發得好
外面百姓尤苦練餉加派須是漸漸減省上默然寔

日天顏和粹曠咨詳悉并言京營戰守諸事奏對尚
多不能盡記也遂賜茶餅而出異日命于文昭閣左
右劄設直房云臣延儒恭記

三殿鼎新賦三殿者皇中建三極殿也初爲奉天華
蓋謹身肅皇帝仰則天垣遠紉禹範爰錫嘉名我皇
御錄中興寶鼎新焉在易鼎之象曰君子以正位凝
命蓋與書維皇建極之指合偉哉虔誠北辰之鴻緯
南面之盛觀也七年中秋落以斯干之雅敬拜手稽
首而獻賦曰源維幽燕闕基黃帝四千餘年明廼繼

之昔剪崖尤我驅蒙古天昧再開王氣雙吐當時所
爲治城闕繕宮室於奉天出治之地尤三致意焉蓋
已高蟠龍虎上憲翳陬籠二儀以爲宮枕萬歲而不
渝矣柏梁之厄盛極而然今皇帝適追祖武堂構是
肩覬殿基作而詔諸中外曰是成祖宅中之區而肅
祖以疇錫福之所延也歸會時其旁正陽歸其前東
西文武左右弘宣冠帶萬國旒冕九天列聖陟降其
可後焉於是命司空契元龜欽天練日營繕經初圭
臬揆景般倕競趨發帑則神廟封椿之貽釀俸則干

官邪許之呼蜀楠吳磚粵石荆銅山祗川后獻瑞効
功爾乃神木輪廠黑窰冶瑤臺諫糾敏匠石窵奇百
司雷運萬輦雲飛曾未幾時而皇極門殿已煥乎其
巍巍矣惟中與建兩殿踵成如彼太乙之宮前有太
乙後有鈞陳是曰紫微帝座三辰倣曩規而增麗浴
濛汜而俄新恢當陽之寶勢快神孫之高門若夫雲
窠星栢重楹飛昂蘭栢藻井螭栒鳳窻金屏玉鋪丹
陛瑤瑤峩峩博敞蔚駁煒煌窳窳莫際施翕有光固
三殿之所同差難得而備方也有兩班文武進而稱

曰斯舉也蓋遲之三十年而成之不日乘靈用幹在
鼎元吉當寶頂之晨安馳露布而生色敢賦周詩上
壽千億於是尚寶陳案教坊奏韶錦衣設幟光祿授
肴黃麾明扇仗鼓排簫仗馬馴象羅擁蟬貂鞭鳴簾
捲玉袞以朝然後七舞八九曲湛稱制賜灑山呼者
三其或冊拜椒掖封遣桐圭臚天人之賢雋受重譯
之航梯禮成郊廟典舉耕蠶頒春小歲獻至日南升
恒進千秋之鏡熊羆叶百堵之占莫不晴熏春羽日
射天香劔鳥花生穆穆皇皇於是屏宓妣却玉女咨

臯夔訪箕呂解網除青吹律回黍貌言視聽被其思
歲月日星釐其序雨暘燠寒五行帥其官食貨徒師
三德脩其監若是故庶徵應五福綏而世爲竹苞松
茂之主也昔堯有鳩宮舜有摠期儉德雖章大壯非
時秦漢諸殿通光臨華神仙增城門千戶萬則汰王
之譏也若衛歌楚室魯美靈光則又諸侯之事也安
足爲今日頌哉帝錫斯疇肅祖命之肅祖錫疇來孝
追之光啟中興不亦偉乎天子曰嘻是於疇叙其八
抑樞在極乎夫皇極者卽堯舜允執之中而建之卽

平康正直之衢三而一者也吾將坐華殿之上燭以
玉燭風以景風使東至寧宮之塔西至松套南至鬼
方解辦面內莫不來同雖黃帝阪泉之兵亦可不用
而穆然治天下以崆峒
隆慶初詔求直言王世貞上疏請正殿名以尊治體
言太祖名大朝門曰奉天門殿曰奉天殿以至詔赦
誥勅俱以奉天冠之明人主不敢以一人肆於民上
無往非奉天也義至精博也願詔門殿仍奉天故號
昭象魏之重不報

古香齋鹽賞袖珍春明夢餘錄卷之七

古香齋寶袖珍春明夢餘錄

順德羅兆駒初校
南海孔昭熙再校
南海孔昭燾三校



古香齋寶袖珍春明夢餘錄卷之八

北平孫承澤著

殿門

奉天門即皇極門常朝之制每日晨興上便服御門文東武西侍鳴鞭畢鴻臚寺卿唱入班百官行叩頭禮分班侍立翰林學士侍御座右錦衣衛官夾陛西立六科給事中分侍左右御史分班面向北立鴻臚官屬立其後先一日謝恩見辭者於鴻臚寺報名至日先進午門外候百官叩頭畢鴻臚寺卿對御前宣奏姓名員數於午門外行五拜三叩

頭禮畢五府六部以次奏所司合行事次通政司引入於御前面奏請旨該司官出班承旨大理以下有事則奏無則已次禮部引差使考滿官員次六科各奏旨意題本守衛揭帖賞賜鈔錠次鴻臚宣奏藩府邊境所遣使臣上命以酒飯賞賜既而兩京堂上新陞者及在外三司來朝赴任者面叩頭畢鴻臚卿唱奏事畢羣臣俱側身向上立鳴鞭畢上乘輦往御武英殿或文華殿閱章疏日率如此至午復出朝晚亦如之此每日常朝之制也每月朔望上具皮弁服御正殿百官公服叩頭畢分班侍立鴻臚寺卿宣

奏謝恩見辭員數畢上出御奉天門視朝如常儀

御門常朝答旨

- 一官員遣祭復命
- 一官員陞遷面恩
- 一官員到京面見
- 一凡各衙門奏事無請旨字樣者已上俱不旨答
- 一太常寺奏祭祀京營官請神旗祭旗手衛請旗纛之神祭并六月初六日請旗纛晒晾吏兵二部奏頒給文武官誥勅尚寶司請寶捧寶并請用寶及

奏關金牌已上俱聖旨是

一官員面辭內有該領勅者叩頭畢聖旨與他勅捧
勅官承旨捧勅下授之有該賜酒飯者受勅叩頭
畢聖旨與他酒飯喫又有該賜銀兩表裏者謝酒
飯叩頭畢聖旨與他賞賜

一通政司奏事先一日進面帖內係吏部者聖旨吏
部知道戶禮兵刑工等部俱如之該都察院者聖
旨都察院知道其云本司奏者聖旨該衙門知道
一吏科進旨意題本兵科進守衛官軍揭帖聖旨接

來司禮監管承旨接上

一御史及序班糾奏失儀官員內過大者聖旨錦衣
衛拿了過小者聖旨饒他

一夜間或從門縫遞出鑰匙一把或城上擲下食物
及衣服等項以試坐更將軍其將軍接得鑰匙當
卽遞進明日兵科引奏不用旨答若食物衣服等
項收執引奏聖旨賞了他

一吏部引奏知印聖旨著東西邊跪的五箇做

一都察院奏差御史接管巡按聖旨著東西邊跪的

去

一年終各衙門類奏差錯聖旨你每說的是且都饒這遭在外的還行文與他每知道

一每月初一日順天府官領耆老等聽宣諭內閣先期擬諭詞上進司禮監官錄一帖隨侍俟彼奏畢皇上以諭詞面諭之或命司禮監官以所錄帖與之

常朝御史糾儀載風憲事宜

戶部署員外主事某人將笏落地事屬失儀合當拿

問請旨

錦衣衛百戶復命不行平身事屬失儀不謹合當拿

問請旨

刑部主事某打斷復命例不叩頭却行俯伏事屬差

錯合當拿問請旨

禮科引奏官吏人等數內官一員跌倒在地事屬失

儀合當拿問請旨

進守衛揭帖官員跌倒在地事屬失儀合當拿問請

旨

兵科給事中某引奏遲誤及刑部主事某奏事重複
俱合通行拿問請旨

金吾左衛具奏儀糧官員數內一員跌倒在地事屬
失儀合當拿問請旨

南京工部辦事官某奏事不出及跌倒在地事屬不
謹合當拿問請旨

浙江布政司公差叅政某朝見不行平身事屬不謹
合當拿問請旨

行人司行人某復命不行稱臣事屬不謹合當拿問

請旨

陝西行部司指揮等官某等奏事行禮差錯俱合拿

問請旨

鴻臚寺序班引班差錯合當拿問請旨

刑科給事中某引奏官吏人等七起說作八起事屬

差錯合當拿問請旨

刑部署郎中某幞頭落地事屬失儀合當拿問請旨

兵科給事中某奏事遲慢及吏科給事中某失稽題

本在地俱合拿問請旨

都指揮某欽賜酒飯不行叩頭事屬失儀合當拿問
請旨

河南按察司僉事某朝見行禮卑身太遲合當拿問
請旨

鴻臚寺堂上官引舞人拖扯不起中間必有別情合
著通使問別奏定奪請旨

鴻臚寺鳴贊某不候某繳勅先贊叩頭事屬差錯合
當拿問請旨

西垣筆記

常朝御門其御座謂之金臺既陞座錦衣力士張五
傘蓋四圍扇自東西陞升立座後左右而內使一執
蓋升立座上一執武備雜二扇立座後正中武備之
制一柄三刃而圈以鐵線裹以黃羅袱如扇狀用則
線圈自落三刃出焉防不虞也

朝儀常朝第三通鼓起先開二門官軍旗校將軍先
進擺列待鐘響朝官依次而進朝象以鼻相搭侍立
午門外

永樂初閣臣遇常朝立金臺東錦衣衛在西後因病

用宮人隨侍遂移下御道東西對立值天雨各衙門
俱上金臺奏事五府立西簷柱外六卿敘立東簷柱
內閣臣退立於後景泰二年秋戶部尙書兼學士陳
循上請始復舊制
朱字傳帖者奉天門朝罷駕與司禮巨璫持下丹陛
呼該衙門官與之次日早朝該衙門官具奏本御前
奏云傳奉事理補奏本鴻臚寺官接遞司禮小璫進
覽墨字傳帖則出自左順門付該衙門奏行不復面
繳若事未穩便須執奏者固不問朱墨也

翰林管誥勅官例當捧勅俟上御門視朝陞座內閣
門官以勅授管誥勅官卽隨輔臣登御階循廊從引
政門至金臺東輔臣立御幄旁咫尺誥勅官立輔臣
稍後尺許俟領勅官過卽轉北向上拱立俟領勅官
自陳某官奉差某處領勅有旨曰與他勅去卽向北
鞠躬授勅一躬而退其制始於嘉靖七年
萬曆三年題准常朝該日記注起居史官四員列於
東班各科給事中之上稍前以便觀聽
常朝舊制每日御門決事萬曆初以方在諒陰聖齡

冲幼閣臣議酌三六九日視朝及二年五月禮部請復舊制閣中擬二票上請仍定三六九日遂沿爲例萬曆五年定朝覲官面見儀兩京府尹行太僕寺苑馬寺卿布按二司俱於十二月十六日朝見外班行禮畢由右掖門至御前鴻臚寺官以次引見其鹽運使及府州縣有司官吏浙江江西十七日山東山西十八日河南陝西十九日湖廣南直隸二十日福建四川二十一日廣東廣西二十二日雲南貴州二十三日北直隸二十四日各朝見外班行禮畢仍至御

前鴻臚寺引見其中廉能官面加獎諭賞賚此深得建國親侯之意蓋從江陵之請也

崇禎十五年七月初九日值常朝臨期傳免閣臣具揭進諫至二十七日降手勅褒嘉皇帝勅諭輔臣周延儒陳演蔣德璟黃景昉吳甦朕以涼德纂服昕夕靡敢荒寧幾務殷煩愆忘是懼賴卿等盡心匡導卽事贊襄視國猶家圖難於易調和銷弭未易枚舉卽如本月初九日偶因微恙暫免早朝方愧宵衣卽勤補贖卿等忠純體國念篤愛君上攷典謨惓惓於君

要臣詳之義深惟易傳懇懇於晝勤夜靜之宜意比
韋絃言同藥石朕心忻悅是用褒嘉惟海宇當多事
之時而拮据賴克艱之佐臣勞而君乃逸內治則外
自寧卿等其益納誨無方匡朕不逮虔終如始共保
天休欽哉故諭


崇禎壬午閏十一月初七日上諭二祖舊制日常朝
見羣臣裁決政事朕今率循成憲除門朝照例應免
日期傳免外餘每日視朝異勳戚文武諸司等官有
欲奏事者赴弘政門報名候召內外官員敢有壅蔽

阻當者以奸欺論斬

按御門非古制也古制天子居總章明堂惟閏月則
居門故閏字從王從門也

古香齋鹽賞袖珍春明夢餘錄卷之八

順德羅兆駒初校
南海孔昭熙再校
南海孔昭燊三校



古香齋鑒賞袖珍春明夢餘錄卷之九

北平孫承澤著

文華殿

文華殿在左順門之東永樂中建其後久不臨御嘉靖踐阼之初諭將文華殿鼎新修建易以黃瓦凡齋居經筵及召見大臣等項俱御此殿九五齋恭默室皆世宗手題殿中橫書一扁學二帝三皇治天下大經大法十二字為神宗御筆殿中經筵每歲以二八月中旬起四十月末旬止月三會講日皆逢二進講每兩人一四書一經講章皆預

呈閣臣轉付中書繕錄正副各二紙隔日進司禮監官奏
知先晚於文華殿內寶座地平之南設金鶴香爐左右各
一於左香爐之東稍南設御案講案各一皆西向案上各
置所講二書以夾講章各壓以金尺一副至期早進近侍
內臣及知經筵官勳臣內閣學士并講官及六部尚書都
御史大理卿通政使鴻臚卿錦衣指揮使及四品以上寫
講章官俱繡金緋袍其展書翰林官與侍儀御史給事中
序班鳴贊等官俱青繡服朝畢駕起御文華殿皆隨之大
漢將軍凡二十名導駕至左順門退易冠帶便服仍各執

金瓜而領將軍或侯或伯者則易金繡蟒衣追越眾官進
左順門皆分班綴行立文華門外埃傳宣云進來則將軍
先入殿內負東西牆立諸臣陞陸鴻臚寺官贊入班行禮
畢以次分由殿東西門入重班立指揮則立西一班末稍
前御史給事序班六員分於中門左右向北立序班二人
舉御案進上二人舉講案置中鳴贊唱進講講官各出班
立講案前展書官二員出班對立鳴贊講官並行禮與東
展書官進至地平膝行詣御案展四書講章講四書官亦
稍前近案展所講書展書官復位先說講某書然後申

講講畢掩書稍退後原展書官仍如儀進掩書復位西展書官與講經官進退俱如前儀講畢仍並行禮各回班序班各撤案聯置舊所鴻臚卿中跪奏禮畢上諭官人每喫酒飯各官跪承旨興以次出丹陛仍行禮乃出左順門宴以官序惟學士之坐立則序于鴻臚寺卿及四品以上寫講章官右展書官坐立亦序于四品之下寫講章官上重職事也至于日講官凡四員日輪二員先大學衍義次貞觀政要二書皆不用講章惟各以黃票書所起止預進先日內臣設御案于文華殿後穿堂中以二書並起止置案

上至日早朝畢四講官同閣臣隨駕入至殿內授內臣以來日起止竅名乃入穿堂門內行禮分班北向前後立東班當講者詣御案前內使授牙籤右手執之且指且講書則向上初展後掩皆屬內侍講畢還籤復位西班當講者乃進講悉如東儀講畢上諭先生喫酒飯皆跪承旨行禮禮前後皆一拜三叩頭出宴于文華門外西廡禁中謂之小經筵亦謂之小講

文華殿東室奉皇師伏羲氏神農氏軒轅氏帝師陶唐氏有虞氏王師夏禹王商湯王周文王武王九聖

南向左先聖周公右先聖孔子東西向歲春秋開講
前一日皇帝皮弁服拜跪用羹酒果脯帛行奠告禮
元人經筵儀節悉備如以勲舊大臣知其事及定期
二八月後累朝皆仍其制翰林承旨嚶嚶曰天下事
宰相當言宰相不得言則臺諫言之臺諫不敢言則
經筵言之
故事勲臣一人知經筵閣臣俱同知經筵後至李文
達賢以內閣首臣與勲臣俱知經筵遂以爲例實非
初制也

國初有弘文館在大內之西以處博學之士正統初
選經筵悉翰林院官內批如何不見居外賢良以旨
赴弘文館于是劉球等自部屬進次經筵

永樂二年前上諭文華殿大學士楊士奇以大學講義
進上覽而善之因諭帝王之學貴切已實用先儒謂
克明峻德一章一部大學皆具士奇曰堯舜禹湯文
武數聖人凡脩諸身施于家國天下者皆大學之理
誠聖學所當先務

宣德二年丁未二月御文華殿講孟子至二老歸文

王章問曰伯夷太公皆處東海而歸文王及武王伐紂太公佐之伯夷叩馬而諫所見何以不同講官對曰太公以救民爲心伯夷以君臣爲重上曰太公之心在當時伯夷之心在萬世無非爲天下生民也宣德三年二月進講舜典上曰觀二典三謨則知萬世君臣爲治之道不出乎此歷象日月星辰以閏月定四時天道以明治水土奠高山大川別九州任土作貢地道以成克明峻德以至協和萬邦人道以建九官十二牧所掌禮樂刑政養民之道後世建官整

簡雖不同要不出乎此當時君臣都俞吁咈更相告戒用圖治功氣象藹然何後世之不能及講臣對曰明良相逢故治化之盛如此上又曰天生聖人爲後世法孔子刪書斷自唐虞使人知有堯舜所謂萬世帝王之師也

三年冬十月庚寅進講春秋上曰聖人匡世之功憂世之心備見此書當時先王禮樂法度日以隳廢亂臣賊子接迹而起有此書而後天下知尊周

九年十二月御文華殿出御書洪範篇及御製序文

示楊士奇等且曰朕在宮中雖寒暑不廢書冊士奇曰帝王勤學問則宗社生民有賴矣惟願始終此心英宗正統元年始開經筵先是宣德以前諸帝每視朝畢無日不御文華殿或便殿召大臣及儒臣講讀時經筵未開也至是年二月從大學士楊士奇之請始開經筵命太師英國公張輔知經筵事少傅楊士奇楊榮同知經筵事少詹事直李時勉等兼經筵官賜宴及金帛有差

成化中司經局洗馬楊守陳進講武成篇云魯論稱

舜無爲而治周書稱武王垂拱而成然後世人主有深居禁中委政內侍者乃召望夷之禍有高居無爲肆情嬖艷者乃啓祿山之變是何也蓋舜之所以無爲者由其封山濬川以至舉相去凶無一不盡其道武之所以垂拱者由其列爵分土以至崇德報功無一不究其心皆由憂勞而有爲乃能逸樂而無爲也若後世之主則孟子所謂安危而樂亡者古今治亂可爲永鑒上聞之竦然

弘治元年三月吏部侍郎楊守陳請遵祖宗舊制開

大小經筵以講學常御早午二朝以聽政其大經筵及早朝卽如舊儀若小講則必擇端介博雅之儒臣侍班進講凡所未明曲加解喻而於義理政事興亡治亂必一一講之精而無疑乃可行之篤而無懈凡經史及祖宗典訓百官題奏皆聚之文華後殿日輪內閣大臣一人講官二人居前殿右廂或有奇奧卽令解對陛下必御文華殿之時多處乾清宮之時少使欲寡而心清惑少而理明則其得於內者深而出治之本立矣上嘉納之

是年四月南兵部主事婁性請遵太祖皇帝用翰林學士宋濂等及太宗皇帝用學士胡廣等故事并成化初年經筵日講事例命內閣大臣妙選詹事翰林儒臣及行取守制養病侍講謝鐸編修張元禎檢討陳獻章等各厚其禮遇輪直召對其文武大臣學行超卓者亦時賜顧問并擇老成清謹內臣給事左右使邪佞無得而間則聰明日廣德業日隆從之
弘治元年御文華殿講書畢賜講臣各織金緋衣金帶及紗帽烏鞞叩頭謝訖上曰先生辛苦感對曰此

職分當為皆頓首而退程敏政有詩記之曰日映紫
恩曉殿深湛恩稠疊駕親臨衰衣紅耀天機錦束帶
黃分內帑金久幸清班容宦履老慚華髮點朝簪經
生職分尋常事消得君王念苦辛

學士王鏊直經筵講文王不敢盤于遊畋章上傾聽
嘉納之時方春屢遊後苑左右或請止不聽及聽鏊
講畢召佞幸李廣戒之曰今日講官所講殆為汝輩
好為之竟罷遊無何廣亦罷尋誅死

張元禎入侍經筵以其身短上特為低几就聽之上

疏勸經筵講太極圖以及西銘孝宗嘉納急索太極
圖以觀曰天生斯人以開朕也

學士劉機經筵進講責難於君謂之恭二句孝宗注
聽久之俯賜清問因辨析陳字之義劉倉卒進講語
不達意上謂之曰此卽敷陳王道之陳也羣臣叩首
謝又謂何以不講末句答以不敢上又曰何善善者
可感善心惡者可懲逸志自今不必忌諱

嘉靖二年御文華殿召講臣至首揖書經君子所其
無逸章繼而講康誥惟民康又章召誥顧畏民暑章

孟子踐形章理義悅心章被衿衣鼓琴章君子反經章是日上御黼座橫經俯詢虛心聽納

講官劉龍進孟子至誠章上批曰龍于至誠能動乃云邇者黃河清是至誠之驗也未免近說但其末云謙以履盈約以保泰此二句却好

又講官倫以訓進論語陽膚為士師講義上批云以訓講哀矜勿喜云是慈悲憐憫夫慈悲二字是釋氏之教也

講官魏校進書經罪疑惟輕章講說上批云桂萼薦

校善講義朕觀其講章並未過人者且其前後率多諛詞難居近侍著吏部調南京用之

講官廖道南進講論語高宗諒陰以下三句又明日進講大學衍義時汪鋐為吏部尙書懇祈大學士張孚敬改題以其有君薨聽於冢宰句也道南執不肯孚敬遂具揭帖以進世宗批云覽卿等奏朕已悉舊日講官徐縉講孟敬子徹去二節人之將死不講夫死生人道之常何諱之有如卿等言則忠讜之論何由得聞還著道南照舊進講明日道南講畢進說云

按說命夢帝賚予良弼其代子言又云其惟不言言乃雍卽是以觀古之人君心純乎孝故宅憂而不暇於有言古之人臣心純乎忠故攝政而不嫌於代言然必有高宗之聖而後可以用傳說之賢必有傳說之賢而後可以輔高宗之德不然則莽操懿溫之流又將以冢宰藉口于千萬世矣乎敬聞之出謂銳曰講官欲中傷之

侍講注佃進講洪範九疇不稱旨令吏部改調外任因命內閣選擇翰林諸臣稱職者留用不稱者量除

他官尋調汪佃寧國府通判而中允劉棟楊維聰等侍講崔桐等皆補外

經筵講官及執事官失儀舊制許令出班請罪得面宥嘉靖六年以經筵乃講學親賢之地一切差誤令侍儀科道退而具奏上請免其自請

嘉靖時祭酒陸深爲講官言講官講章不宜輔臣改竄使得自盡其愚因以觀學術邪正嘉廟初李康先爲講官亦言講官講章宜徑達御覽閣臣不必改易萬曆元年五月定春講以二月十二日起至五月初

二日止秋講以八月十二日起十月初二日止不必
題請

萬厯初御經筵畢覽貞觀政要曰唐太宗多有慚德
魏徵大節有虧命以後講禮記其貞觀政要停講
萬厯元年正月初七日出御文華講讀舊例節假二
十一日始開上假內御講帷勤于問學前此未有是
月卽允閣臣所請開經筵神宗因張居正進帝鑑圖
說至宋仁宗不喜珠飾事上曰國之所寶在于賢臣
珠玉之類寶之何益又至秦始皇銷兵事上曰木棍

豈不能傷人何以銷兵爲

二年二月神宗御文華殿講讀手書學二帝三王治
天下大經大法十二字懸之文華殿中又諭輔臣張
居正曰朕欲賜先生等及九卿掌印并日講官各大
書一幅以寓期勉之意先生可於二十五日來看朕
寫是日大書宅揆保衡同心夾輔各一幅正已率屬
九幅陳善書難六幅敬畏二幅分賜各臣

是年十二月講讀畢問張居正元夕鰲山烟火祖制
乎對曰非也成化間以奉母后當時諫者不獨言官

皇朝通志卷九十一
卽如翰林亦有三四人上疏糜費無益所當節省上
曰然明年元夕罷烟火鰲山

三年神宗日講至漢強項令董宣事謂輔臣曰彼公
主也尚不能私庇一奴外戚家何可不守法

三年日講畢上命中使捧皇太后御書示輔臣言聖
母在宮中唯觀書史課宮人俱讀書寫字張居正曰
此聖母愛不忘勞端身教也因勸上勉力問學上曰
先生言是朕當勉之

泰昌元年十月二十日經筵以是日頒郭王兩太后

諡論改二十一日講官孫承宗講克明峻德以親九
族一段臨登講筵時念上方有官幃之隙因就親睦
九族處重發一番其語云帝堯德爲聖人尊爲天子
第一要緊事便重九族決不敢自恃說自家是至尊
便輕疏一家骨肉所以要親愛既親愛之便處置一
家各得其所所以一家骨肉相親相睦無有怨心又
曰九族是自己一身爲一族上有高曾祖父是四族
下有子孫曾元是四族共爲九族如上內有宮眷戚
畹外有宗族親藩以親是同其好惡同其富貴卽先

朝所遺眷屬務要仁至義盡無使恣縱無使怨恫等語上退至九五齋謂內璫孫講官的話竟是本章又曰今日纔知九族甚稱善

熹廟初御講筵內閣戒講官講章宜簡要講學勿多獻替孫承宗曰主上幼冲正宜詳明切直博引曲譬若講官聽中堂為及改中堂又視中官為忌講則講筵為無人矣講官李光元亦以講章不宜及改上書爭之於是勿改承宗謂內侍王安及高時明以上御講筵恭默無一問難當如常朝奏事例有口答上問

某句講官通俗細解再問講官又細解俾上漸通曉機務與臣下日親日熟入而後說之此啓沃之要也時明曰非復午講不可安曰甚善當請修九五齋時明日孫公欲致君堯舜須有茅茨土階遺意何必脩齋而後講乎

崇禎元年文華殿議政諭朕自御極以來夙夜焦勞惟茲封疆民瘼圖維在念而邊備積弛間閭久困臣工習俗相沿尙牽情面之故套政事奉行不實徒誇紙上空言故屢召平臺時屢商確期振惰窳之弊

一新明作之猷第召見以時則情意未洽咨詢有間
或參酌未詳朕欲與大小臣工日相首接共籌庶務
而諸司各有職掌辦理各有公署宜召煩愆滋耽
閣惟是輔臣職任股肱誼協心膂票擬摺封疆之要
領獻納關庶政之權輿呼吸聯通斯爲最切今後除
盛暑神寒之外朕當時御文華一切章奏與輔臣面
加參詳分別可否務求至當爾大小臣工各宜精白
乃衷靖共爾位有官守者恪修職業毋飾虛文而務
實事有言責者殫竭惻誠毋昧自心而恣勦說其事

關奏對論宜剖晰者仍不時單宣面垂詢察核舉廢
以程勤惰按是非以辨貞邪奉公有特簡徇私有顯
罪一洗欺玩頹靡之習共收奮庸熙績之功爾等欽
哉故諭

崇禎十五年八月經筵勅諭朕惟帝王圖治必以務
學爲先蓋敬怠總握於君心而法戒備彰於古訓講
學勤政相須尚矣我祖宗神聖御天率隆斯軌朕用
遜志罔敢荒寧爰自元年講筵肇舉於今十有五載
方以明透經義實裨治理爲儒臣勗乃至宥密之地

彌資啓沃之功茲特命太傅成國公朱純臣少傅兼
太子太傅吏部尚書建極殿大學士周延儒知經筵
事禮部尚書兼文淵閣大學士陳演禮部尚書兼東
閣大學士黃景昉蔣德璟吳牲同知經筵事禮部尚
書兼翰林學士林欽楫等充經筵講官於戲終始典
於學克建赫濯之猷緝熙單厥心爰迓版章之福自
古帝王之學問非徒文字之敷陳其道在知人安民
其本在正心誠意脈絡雖遠綱領可尋朕每寤寐五
三表章六子間沿今以邇古而實效尚稽卽因理以

求心而精義未晰卿等學在經世志矢格君尚其深
研危微明陳標本以及人才國是吏治民生一切安
內攘外之圖務求制勝保邦之要各殫忠藎勿騁繁
華俾嘉言得見諸施行而上理可追於隆古予一人
實嘉賴焉欽哉故諭

崇禎帝以丁卯八月御極是年十月卽先開日講十
月初二日御文華殿講大學一章尚書堯典一章帝
鑑圖說一章帝退御便殿以御書示閣臣諸臣皆贊
美帝曰書有不如法處卿等當爲改正輔臣叩首謝

按故事日講官一員直講一員直讀直讀者先讀五
過上隨口讀已方直講者進講是日傳免進讀越三
日復傳免講帝鑑圖說講祖訓通鑑二書
丁卯十月十二日上御講筵畢召輔臣黃立極等入
便殿出督師尚書王之臣疏示之諭曰朕覽王之臣
疏自稱贅員又曰虛拘顯因內臣在彼牽制不使行
事朕欲將各邊內鎮盡行撤回一切兵馬錢糧著交
割各督撫鎮道衙門封疆事重王之臣須一力擔當
卿可擬勅諭來看

崇禎元年戊辰二月癸丑上初御經筵以英國公張
維賢大學士施鳳來充知經筵官大學士張瑞圖等
充同知經筵官侍讀學士溫體仁等十六員充講讀
官編修倪嘉善等八員充展書官講堯典大學各一
章賜各官筵宴銀幣鈔錠有差

戊寅春經筵講官王鐸講聰明睿知一章分疏敬信
悅字反語太多言時事又有白骨如林等語講畢上
怒謂其敷衍數語支吾了事全不能發揮精義王出
案前待罪良久上命起來又忘謝恩其次講尚書者

乃黃錦聲細而哀無一字可辨上不懌而退
辛未羅喻義送講章於閣臣溫體仁令改不肯遂至
疏叅言舊例性經筵進規多於正講日講則正講多
進規少今喻義以日講而用經筵之例駁改不聽自
媿不能表率後進等語乃下部議處部議云聖聰天
縱而喻義嘵嘵多言遂以閒住處之講章原無定例
體仁特借以除異已而部覆又咄其詭隨於是喻義
自上一疏云先是講官諸臣以聖學淵深經生常語
懼不得當特於正文外頗及世務適臣派講尙書惟

我商王布昭聖武一章謂可以闡愚忠矣於是焚香
鍵戶或臥或興遍及京營之練大閱之禮然不敢臆
說悉本先臣讜言明聖成憲嘔心劘肝冀少裨益而
爲尺幅所窘僅若干言至本月十七日携至直廬示
同事而後脫藁至鄭重也亭午輟直臣與同官會食
西閣下俄而閣役呼召臣至閣門久之未得見門吏
言過午則講章不便進呈臣不得已稍進求面請教
而又不得見但趣臣削去後半段文字夫成之數日
改之片時勢亦安能往復甚苦臣謂臣官可去藁不

可削遂不得已趨出也噫臣于此日亦大難矣削之則寥寥數語無以對揚吾君不削則嗷嗷執爭何以勉承人意人之言曰爲臣不易乃今知之然總微臣愚昧之過也今講章見在御前伏乞皇上罷斥臣身以明臣過并賜省覽臣言以明臣心臣孤立無黨度無全理願歸身皇上以憑進止臣雖去有餘榮矣日講一章惟我商王布昭聖武代虐以寬兆民允懷伊尹又說有夏敷虐萬方誰能仗天下之大義爲兆民除害者當時無其人也惟我商王成湯奮義理之勇

興師正罪敷著其武德於天下敵方以虐我獨以寬除去一切與之更始如相代矣於是兆民之衆皆信懷我商王之德知其志在於救民也湯之得天下者以此臣謹按制治以文戡亂以武易稱神武而書稱聖武聖者生知之目成湯智勇天錫猶曰此聖於武者也考湯征不專是伐夏書序言湯伐夏升自陬戰于鳴條夏師敗績遂伐三腹韋顧昆吾同時殄滅東征西討武功暢焉布昭猶曰次第布之云爾然亦得伊尹以爲之將故所向有功其詩曰實惟阿衡左右

商王此之謂也恭惟我皇上神聖性成大寶初登手
剪兇逆淵謀秘策動合兵機可謂聖于武矣而近日
戰功猶未大暢無亦左右之者未得其人歟夫伊尹
大聖世不恆有卽如唐史稱高宗文練卒五千常如
寇至奉命討西川卯時受詔辰時卽行今大凌之援
經月不能出師何哉臣謂欲振武功則團操不可不
講也先臣許國嘗著論曰昔高皇帝提劍滁陽混一
天下乃營中軍左右掖左右哨曰五軍營文皇帝以
胡騎三千入靖內難因而營之曰三千營後征南交

得飛鎗流矢因而營之曰神機營此三大營之所自
起也承平旣久營兵漸墮乃始抽其精銳而以四營
分隸三營共十二營此十二營之所自起也但其名
雖十二而實統於三統之者所以握其重而分之者
所以致其精兵精而勢益重矣許之此論蓋善夫團
營也先臣楊一清亦言京營將領宜依弘治間劉大
夏議凡邊將曾經戰陣偶坐事閒居者悉取至京付
蒐選教練之任於是周尙文等諸名將比出矣今不
可做而行乎然欲講團操則大閱不可不舉也昔高

皇帝有雞籠山之閱文皇帝有鳴鑾成之閱章皇帝有兔兒山之閱睿皇帝有西苑之閱莊皇帝有大教場之閱成憲具在不可做而行乎茲事最關戎務乘此人心廢弛之後大駕親臨旌旗生色可以選將可以簡兵惟是舉事須有微權臣請先下其令而大展其期俟戎政操練已成然後奏請舉行一以紓經費於目前一以需成功於歲月從此張皇六師爰整一怒內安諸夏外制四夷雖仰同殷武可也

庚辰八月十二日當開經筵而初四日廷杖詞臣黃

道周初十日又杖救道周者戶部主事葉廷秀上意弗懌改期二十二日又係憲宗熹宗忌辰鴻臚請用青錦繡上改二十三日

壬午九月二十五日諭禮部經筵大典禮宜嚴肅以後定于辰時行供事各官照日講例著文書官預傳站班不得參差遲悞該部卽行傳飭特諭

壬午八月二十二日上御文華殿日講故事經筵有二案一在御前一在講官前俱有講章而日講則止一御案第以經書置案上講官指書口講無講章也

講官韓回維屢次遺忘帝以矜慎寬之先數日帝諭
輔臣曰講可照經筵例亦置講章朕有所疑可據以
問難而講官亦不至遺忘因具揭帖進呈卽批發令
傳與講官知是日遂用講章在御前講官用牙簽指
講

壬午九月十八日上日講講官講論語子罕言一節
書旅葵春秋大水孟子北宮黝節畢帝召輔臣前問
夫子論仁如欲立欲達克己復禮天下歸仁及出門
使民等語言仁儘多何云罕言輔臣延儒對此卽性

與天道不可得聞之意德璟對聖人未嘗不言仁只
門弟子悟者以爲言不悟者以爲罕言耳又問命與
仁如何分別德璟對總是一理在天爲命在心爲仁
帝首肯又問一日克復天下歸仁便是脩己以安百
姓意思輔臣極贊以爲聖見明徹吳姓言帝王學問
總只是明德新民德璟言明明德於天下便是天下
歸仁頃之帝曰近來雨暘時若秋令甚佳輔臣因及
起廢事公薦葉廷秀成勇最有清望上頷之次日手
諭昨先生等論仁諸說深當朕心著卽撰寫進呈以

便觀覽

壬午八月二十四日日講詹事即瑜講師摯之始章
帝問咸英韶濩瑜對是四代樂名上曰子在齊聞韶
樂瑜對卽此韶樂上復問關雎之亂亂字瑜對是樂
之卒章上曰當時夫子聞韶三月不知肉味是何等
氣象因顧輔臣卽諭禮部舉知樂之人曾有之否對
未有上曰古樂亦尙可復輔臣蔣德璟因薦黃道周
知樂

文震孟在講筵端恪能致人主之聽一日上偶加足

於滕文講時誦講章中語拱手曰爲人君者可不敬
哉又重申之曰爲人君者可不敬哉上竦然爲之下
足端聽

倪元璐以大司農充講官講生財有大道一節極言
加派聚斂之害上震怒謂邊餉匱乏部中未見有長
策徒作此皮面語倪徐曰臣儒者所陳雖是本頭書
生語然不敢懷利以事君上默然次日謂閣臣曰講
筵有問難而無詰責昨日之言朕甚悔之

張居正進日講儀注

一每日講讀大學尙書先讀大學十遍次讀尙書十遍講官各隨進講畢卽退

一講讀畢皇上進暖閣少憩司禮監將各衙門章奏進上御覽臣等退在西廂房伺候皇上若有所諮問乞卽召臣等至御前將本中事情一一明白敷奏庶皇上睿明日開國家政務久之自然練熟

一覽本後臣等率領正字官恭侍皇上進字畢若皇上欲再進暖閣少憩臣等仍退至西廂房伺候若皇上不進暖閣臣等卽率講官再進午講

一近午初時進講通鑑節要講官務將前代興亡事實直解明白講畢各退皇上還宮

一每日各官講讀畢或聖心於書義有疑乞卽問臣等再用俗說講解務求明白

一每月三六九視朝之日暫免講讀仍望皇上於宮中有暇將講讀過經書從容溫習或看字體法帖隨意寫字一幅不拘多寡工夫不致間斷

一每日定以日出時請皇上早膳畢出御講讀午膳畢還宮

一查得先朝事例非遇大寒大暑不輟講讀本日若遇風雨傳旨暫免

文華殿初舉經筵謝表知經筵事太師英國公臣輔同知經筵事少傅兵部尚書兼華蓋殿大學士臣士奇少傅工部尚書兼謹身殿大學士臣榮禮部尚書兼翰林院學士臣溥兼經筵官詹事府少詹事兼翰林院侍讀學士臣直少詹事兼翰林院侍讀學士臣英翰林院侍讀學士臣時勉臣習禮侍講學士臣循侍讀臣衷侍講臣毅脩撰臣愉臣鼐等茲者恭遇經

筵肇啓聖學維新講讀侍臣咸膺恩澤謹恭表稱謝者臣輔等誠懼誠忭稽首頓首上言伏以天清地寧昭聖皇之統御時康道泰美文治之隆興日月光華中外怵悅恭惟皇帝陛下聰明睿智廣天寬仁尊尊親親崇兩宮之至養推恩布德得四海之懼心是以三光全而寒暑平五穀熟而人民有益勤稽古之學益弘養正之功謂易書詩禮春秋之文皆堯舜禹湯文武之道萬幾有暇恒親御以經筵多聞是求肆詳延於儒雅用資啓沃用政進修上以承帝王心法之

傳下以錫臣民皇極之福光祖宗之洪業擴海宇之
隆平臣輔等猥以庸才咸叨榮命荷絲綸之飭勵繼
宴錫之駢蕃於緝熙畢厥心允協周成之德念終始
典于學敬陳商說之篇

神宗遺事

萬曆二年四月面諭輔臣作對聯先擬三字對云天
地泰對日月明張居正賀云永樂十一年端午宣
宗隨成祖北京射柳連發三矢皆中又出對云萬方
玉帛風雲會卽對云一統山河日月明成祖大喜賜

名馬絛絲等物時宣宗年十五也上所對適與符合
萬曆九年御文華出宣廟元兔圖示輔臣講官各
賦詩親書於軸仍自用印記又出永樂四駿圖以賜
輔臣四駿者文皇用兵所乘也輔臣爲題詠奏之上
悅賜金已又出永樂騶虞手卷賜輔臣藏之閣中此
乃小卷仍有一卷長數丈鋪於文華殿僅乃竟卷
于文定慎行云經筵進講在文華前殿日講在殿後
穿廊正字在後殿東閣設一幄次又東一室乃上所
遊息一日同二三講臣入視見窻下一几几上設少

許書籍又一二玉盆盆中養寸許小金魚乃上所玩弄也西壁一几几上筆硯無甚珍異筆皆市中所買上貼筆匠楊彥章名紙皆折簡一如士人所用其樸如此

于文定慎行日甲戌四月賜輔臣張居正宅撥保衡四字呂調陽同心夾輔四字六卿正已率屬各一講臣六人責難陳善各一時慎行尙未與講六人者學士丁士美宮坊何維文陳經邦許國學士申時行及翰撰王家屏也丙子侍讀張位及慎行補講幄上顧

相臣曰新講官二人尙未賜與大字相臣曰惟上乘暇揮灑一日內使濡墨以俟上遂大書二幅賜位及臣慎行字畫比賜諸公大而老成莊勁又若勝前歲者蓋御齡已十五矣一日謂居正曰朕欲爲先生書太岳二字居正頓首曰老臣不敢乃已

古香齋鑒賞袖珍春明夢餘錄卷之九


古香齋鑒賞袖珍春明夢餘錄

卷九

七

古香齋鑒賞袖珍春明夢餘錄

順德羅兆駒初校
南海孔昭熙再校
南海孔昭燾三校



古香齋鑒賞袖珍春明夢餘錄卷之十

北平孫承澤著

文華傍室

文華殿原係東宮講讀之所天順中始移於殿之東廂房
每早各官繡服行禮分立東宮自座上背誦先日之書畢
講官直上地平內侍授以牙籤指書而講講畢退食東宮
易袂徽金鑲寶石帶玉緜向西窗習做書一張各官易素
袍復進通講三日之書畢諭先生每喫茶各官叩頭而出
內臣設一卓將東宮做書請視閣臣以硃筆點字之端楷

古香齋春明夢餘錄

卷十

十一

者

元時太子講讀之所曰承華明日文華永樂中著文華寶鑑賜太子

太子出閣講官陳經書於前講官讀一句太子照讀一句或五遍或十遍大約讀重於講故官銜讀列於前然通謂之講官

天順二年禮部請皇太子出閣讀書上召李賢謂曰東宮講讀當在文華殿朕欲避此往居武英但早晚朝太后不便姑以左廊居太子此東宮移居之始也

英宗爲太子年二歲孝宗年六歲武宗尙未週年光宗以萬曆二十二年甲午出閣講讀時年十三崇禎十年丁丑禮部請太子出閣講讀時太子年九歲矣上定明年二月遂以戊寅正月冠二月初七日出閣已卯八月兵部選東宮侍衛人員於五府衛所子弟選一等名帶刀舍人一百五十六員名二等名控馬侍衛二百二十員名開講朝賀之日在文華門外侍立

東宮講讀侍班皆用詹事春坊如萬曆四十四年題

詹事劉一燝韓爌二人侍班及庶子張邦紀等六人講讀皆坊局官也萬曆二十九年東宮冊立三十年正月開講侍班四講讀六翰林兼司經局較書二侍書二閣臣提調每日輪一員入侍光宗出講閣臣連侍三日以後逢三輪侍崇禎中東宮出閣閣臣初侍三日以後遇三八日全進餘日一人輪侍

崇禎十五年八月閣臣恭進東宮講儀

一覽史以佐經察舊儀有讀四書讀經史之文似宜於經書外每摘簡要通鑑一段進講於凡治亂邪正

是非之際詳細開陳庶以古鏡今為益不小

一省讀以進業舊儀經書各讀十遍為蒙養聖功伏見皇太子聰穎非常似可各省為五遍以餘力用之閱史作對既可養氣兼可旁通

一對句以致知相傳祖宗朝講讀畢皆有對偶之句繇淺漸深繇近及遠比物連類觸發頗多似可將舊對佳者集為一帙恭候東宮時取覽觀間作一對容臣等與侍班講讀官互相參叩似亦格致一端一問辨以去疑聞高皇帝每令儒臣進講必令反覆

三才卷之四
討論以求義理之極如講洪範講立政講攻乎異端
及心箴皆至闡聖真出自天悟至肅皇帝聽講尤多
發前賢所未發皇上精洞古今同符二祖計萬幾之
暇所以諭東宮者耳提面命無不周到而講官進講
時間有疑義東宮亦可時賜詰問以盡下情
一時習以基聖先臣詹事吳寬言東宮講學自寒暑
朔望令節外一歲之中不過數月一日之內不過數
刻況其間又多間歇卽日習讀於內終不若出就外
傅親近儒臣講習治道所得爲多也商書言終始典

學周頌言日就月將皆守成芳躅謹舉以爲時習不
厭之助

親王受封未之國者當出閣讀書永樂後擇翰林官二員
輪日講讀迨之國日遂改陞長史以從故預者多不願宣
德中周文襄忱自刑部主事陞越府長史未幾越國絕遂
陞侍郎巡撫南畿正統中儀銘楊翥爲郕府講讀官後郕
王嗣位以從龍官至宮保尙書天順初德王秀王等出閣
內閣李賢以親王四用官八員翰林官少請於新進士選
用授以檢討之職遂著爲例

崇禎皇子定王於壬午正月出閣永王於癸未八月出閣皆命吏部選新進士爲檢討國子助教等官爲待詔充講讀以兩房兩殿中書充侍書每遇出講則王從皇極門之左弘政門出紅板橋用校尉八人青羅小傘二柄與至尊同而隨侍內璫六人皆金帶也王至皇極門下輿趨過西復上輿至書堂陛下出輿閣臣率講讀侍書官立於門右一躬候王入書堂至先師前行禮畢出坐堂中王命先生每來一躬卽分班入門內閣臣左立餘各官稍退分左右立一躬出

班初開館行四拜禮以後行一拜禮不叩頭也讀四書書經各五遍講四書書經各二遍王命先生每喫酒飯卽出用酒飯畢再入侍王寫做閣臣至案前環觀王親寫十字餘俟諸臣退後寫足送閣閣中批圈畢進呈

皇極門外兩廡四十八間除曠八間外實四十間東二十間爲寶錄玉牒起居諸館及東閣會坐公揖處西二十間上十間爲諸王館下十間則會典諸館也定王書堂在西第六間爲讀書處第五間懸先師孔

子畫像四配侍側蓋摹吳道子筆及永王出閣因移
 定王第四間而永王在第六間王初出閣向先師行
 四拜叩頭禮以後則行一拜三叩頭皆內官贊禮第
 三間第七間為二王退居處案上置四書書經白文
 及集註大學章句或問洪武正韻海篇直音諸書皆
 紅綾殼

古香齋鑒賞袖珍春明夢餘錄卷之十

古香齋鑒賞袖珍春明夢餘錄卷之十一

武英殿

北平孫承澤著

武英殿在右順門之西規制如文華凡齋居及召見大臣
 其中後以文華殿近慈寧宮故歷朝多居之而移太子講
 讀於南廡至嘉靖建九五齋於文華殿以為致齋之所而
 武英遂不復御

文華有直殿中書擇能書者居之武英有待詔擇能
 書者居之如宋之書畫學是也然宋朝立學時有考

較至明惟以中官領之不關藝苑無從考其殿最故
技藝之精遠不及宋宣德獨好畫品武英待詔間有
一二著名者至書法以姜立綱為宗類如椽史矣

仁智殿

仁智殿在武英殿後命婦朝賀中宮之地朝儀前期一日
女官陳設皇后寶座于宮中設香案于丹墀之南其日清
晨內官陳設儀仗於丹陛之東西及丹墀東西女官擎執
者立于寶座之左右陳內樂於丹陛東西北向設而不作
設篋案于殿東門外設班首拜位及各命婦拜位于丹墀

北向設司贊位於丹墀東西設司賓位於命婦班之北東
西相向設內贊二人於殿內東西命婦至宮門外司贊引
命婦入就拜位女官具服侍班如常儀尙冠尙衣等官詣
內奉迎尙儀奏請陞座皇后具禮服出導從如常儀陞座
司贊唱班齊贊四拜外贊唱進篋贊眾命婦跪引篋案女
官二人由殿東門入至殿中篋案不宣命婦皆與司贊唱
四拜尙儀跪奏禮畢皇后興還宮命婦以次出

鹵簿

丹陛儀仗三十六人黃麾二戟五色繡旛六戈五色

繡幡六鎧五色繡幡六小雉扇四紅雜花團扇四錦
曲蓋二紫方纛二紅大纛四

丹墀儀仗五十八人班劍四金吾杖四立瓜四臥瓜
四儀刀四鐙杖四骨朵四斧四響節十二錦花蓋二
金交椅一金脚踏一金水盆一金水罐一方扇八
宮中常用儀衛二十人內使八人青五色繡幡二金
斧二金骨朵二金交椅一金脚踏一宮女十二人金
水盆一金水罐一金香爐一金香盒一金唾壺一金
唾盂一拂子二方扇四宮女服用紫色團領穿袖偏

刺折枝小葵花於上以金圈之珠絡縫金束帶紅裙
弓樣鞵烏紗帽飾以花帽額緞團珠結珠鬢梳垂珠
耳飾

冠服

冠爲圓匡冒以翡翠上飾以九龍四鳳大花十二樹
小花如大花之數兩博鬢十二鈿服袴衣深青爲質
畫翠赤質五色十二等素紗中單黼領朱羅縠襪襪
裾蔽膝隨衣色以緞爲領緣用翟爲章三等大帶隨
衣色朱裏紕其外上以朱錦下以絲錦鈕約用青組

玉革帶青襪青烏鳥以金飾凡朝會受冊謁廟皆服之燕居則服雙鳳翊龍冠首飾釧鐲以金玉珠寶翡翠隨用諸色團衫金繡龍鳳文帶用金玉命婦冠服

一品冠花釵九樹兩博髻九鈿服用翟衣色隨夫用紫繡翟九重素紗中單黼領朱縠褙襖膝隨裳色以緞爲領緣加文繡重翟爲章二等大帶隨衣色革帶用玉青襪烏佩綬二品冠花釵八樹兩博髻八鈿服用翟衣八等其色隨夫用紫革帶用犀角餘並

同一品三品冠花釵七樹兩博髻七鈿翟衣七等其色隨夫用紫革帶用金餘同二品四品冠花釵六樹兩博髻六鈿翟衣六等其色隨夫用紫革帶用金餘同三品五品冠花釵五樹兩博髻五鈿翟衣五等其色隨夫用紫革帶用烏角餘同四品六品冠花釵四樹兩博髻四鈿翟衣四等其色隨夫用緋革帶用烏角餘同五品七品冠花釵三樹兩博髻三鈿翟衣三等其色隨夫用緋革帶用烏角餘同六品

崇禎五年三月二十八日皇后千秋命婦例當朝賀

久不行閣擬二票一免一是上用是字而是時京官以驛遞禁用夫馬罕携家者多携妾媵卽間有之亦多不習是日惟勲臣成國公朱純臣夫人韋氏等七人文職禮部侍郎姜逢元詹事何吾驤兩淑人而已然何淑人尙云候封則未封也又鴻臚卿等三人武職都督十五人共命婦二十七人耳教坊司奉樂等官妻李氏四名口女樂來定三十六名口其日甫明中宮已御仁智殿行禮畢命婦卽歸亦無頒賞例也先十日文書房傳諭文武命婦從西安門北安門進

西華門赴武英殿行禮仁智殿在武英後中宮受朝賀之所也

甲戌三月命婦再朝賀林尙書欲植莊少司農欽隣二夫人與焉諸命婦可百餘人自西華門外下輿入門復肩輿至武英殿門外下黎明皇后升殿諸命婦入排班下手立四拜女官宣箋表跪班首成國夫人入殿內致詞命婦皆跪三叩頭起四立拜而出以立爲拜不復俯伏也是日皇后母嘉定伯夫人亦入班朝賀畢卽召入殿皇后欲設座拜之辭不許皇后面

有泪痕先是二十四日上以祈雨出宿文華是日方入宮故事東西宮備宴奉邀上與中宮上座上以齋素辭翌日再出文華

崇禎帝事皇嫂懿安皇后甚恭每年十月初六為懿安聖節許命婦朝賀崇禎辛巳十月行賀文官命婦無一至者惟武命婦十八人耳上令司禮監呼儀制司詰問時道路冠警又楊司馬嗣昌嚴申驛禁官至八座僅用夫二十名以次遞減僅至數名勢難携家也教坊司女樂舊用一百十五人後惟用三十餘人

耳


古香齋鑿賞袖珍春明夢餘錄卷之十一

順德羅兆駒初校
南海孔昭燾再校
南海孔昭燾三校



皇朝通志卷之十一

六



古香齋鑒賞袖珍春明夢餘錄卷之十二

北平孫承澤著

文淵閣

文淵閣係中秘藏書之所明初伐燕詔大將軍收秘書監圖書典籍太常法服祭器儀衛及天文儀象地里戶口版籍既定燕詔求遺書散民間者永樂辛丑命修撰陳循將南內文淵閣書各取一部至京計取書一百櫃載以十艘又遣官四出購買故閣中所積書計二萬餘部近百萬卷刻本十三抄本十七蓄積之富前古所未有也嘉靖中閣

皇朝通志卷之十一

七

災書移通集庫及皇史宬

洪容齋云梁元帝在江陵蓄古今圖書十四萬卷將亡之夕盡焚之隋嘉則殿有書二十七萬卷唐平王世充得其舊書於東都浮舟沂河盡覆於砥柱貞觀開元募借繕寫兩都各聚書四部祿山之亂尺簡不存代宗文宗時復行搜採分藏於十二庫黃巢之亂存者蓋渺昭宗又於諸道采訪及徙雒陽蕩然無遺宣和殿太清樓龍圖閣所儲靖康蕩析之餘盡歸於燕觀此則知燕之書蓋合宋金元三朝所蓄而爲一

代之書計數百萬卷縹緗之後造物所忌也

周禮太史掌建邦之六典又有外史掌四方之志三皇五帝之書漢氏圖籍所在有石渠石室延閣廣內貯之於外府又有御史居殿中掌蘭臺秘書及麒麟天祿二閣藏之於內禁後漢圖書在東觀桓帝延熹二年始置秘書監一人掌典圖書考合同異唐制秘書省掌經籍圖書之事秘書郎掌四部圖籍較書郎掌較讐典籍刊正文章宋有秘書監掌古今經籍圖書國史實錄天文厯數之事官有小監監丞屬有著

作郎秘書郎較書正字各以其職隸於長貳明初設秘書監秩正六品先除監丞一員直長二員使掌秘書後改典籍及文淵閣中書移之他所而典籍乃爲內閣辦事官失立官之意矣弘治五年閣學士邱濬請於文淵閣近地別建重樓不用木植但用磚石將累朝實錄御製玉牒及干係國家大事文書盛以銅櫃庋於樓之上層如詔冊制誥行禮儀注前朝遺文舊事與凡內府衙門所藏文書可備異日纂修全史之用者盛以鐵櫃庋之下層每歲曝書先期奏請委

翰林院堂上官一員曬晾事畢封識內外衙門因事欲有稽考者必須請旨不許擅開旨允行正德間閣學士楊廷和請令中書胡熙典籍劉偉與主事李繼先查核書籍由是盜出甚多永樂初問文淵閣書皆備否解縉對經史粗備惟子集尙缺上曰士人起家皆欲積書况朝廷可闕乎遂召禮書鄭錫令擇通知典籍者四出購求且曰書籍不可較價值惟其所欲與之又曰置書不難須常覽有益

洪武二年八月詔儒臣修纂禮書其書以吉凶軍賓

嘉冠服車輅儀仗鹵簿字學樂爲綱所該之目吉禮
十四日祀天曰祭地曰宗廟曰社稷曰朝日曰夕月
曰先農曰太歲風雲雷雨師曰嶽鎮海瀆天下山川
城隍曰旗纛曰馬祖先牧馬社馬步曰祭厲曰祀典
神祇曰三皇孔子嘉禮五日朝會曰冊拜曰冠禮曰
婚禮曰鄉飲酒賓禮二曰朝貢曰遣使軍禮二曰親
征曰遣將曰大射凶禮二曰吊賻曰喪儀又冠服車
輅儀仗鹵簿字學各一樂三曰鍾律曰雅樂曰俗樂
凡陞降儀節制度名數纖悉備具通五十卷賜名大

明集禮

洪武二十六年上以諸司職有崇卑政有大小無方
冊著成法恐後之泄官者罔知職任政事施設之詳
命吏部同翰林官倣六典之制自府部以下諸司凡
其設官分職之類彙編爲書名曰諸司職掌行之
洪武二十八年脩寰宇通志其書方隅之目有八東
距遼東都司又自遼東東北至三萬衛西極四川松
潘衛又西南距雲南金齒南距廣東崖州又東南至
福建漳州府北暨北平大寧衛又西北至陝西甘肅

爲驛九百四十浙江福建江西廣東之道各一河南
陝西山東山西北平湖廣廣西雲南之道各二四川
之道三爲驛七百六十六凡天下道里縱一萬九百
里橫一萬一千七百五十里四夷之驛不與焉
永樂中命解縉纂集類書爲文獻大成嫌其未備乃
命姚廣孝重修正總裁三人副總裁二十五人纂修
三百四十七人催纂五人編寫三百三十二人看詳
五十七人謄寫一千三百八十一人繕送教授十人
辦事官吏二十人凡二千一百八十八人永樂五年十

一月告成凡二萬二千二百一十一卷裝成一千九
十五本各以韻爲類賜名永樂大典貯文淵閣副本
貯皇史宬

永樂中命儒臣集宋儒五經四書傳註纂修之其諸
儒論說於傳註互發足其所未備者分註其下不合
者不取周官儀禮不課士置科不列書成賜名四書
五經大全書諸儒語錄足羽翼聖經者彙爲一編賜
名性理大全書

成化十年命編纂宋元綱目以閣臣彭時等爲總裁

官以宮坊翰林劉珣邱濬程敏政劉健楊守陳尹直
彭華謝一夔等爲纂修官分八館未五年而書成
弘治五年命內閣諸臣倣唐宋會要及元人經世大
典大元通例編成一書賜名大明會典其書以諸司
職掌爲綱以度數名物儀文等級爲目附以歷年事
例使官各領其屬而事皆歸於職用備一代定制以
便稽考嘉靖二十八年修之萬曆十五年再修之一
代之大經大法備焉其餘諸書不具載
陸文裕深曰宋太宗平列國所得禠將之士最多無

地以處之於是設六館修三大部書命宋白等總之
三大部者冊府元龜太平御覽文苑英華也御覽外
又修廣記五百卷永樂靖難後修永樂大典亦此意
余按宋太宗詔諸儒編集故事一千卷曰太平總類
文章一千卷曰文苑英華小說五百卷曰太平廣記
醫方一千卷曰神藥普救總賜名曰太平御覽若冊
府元龜一千卷乃真宗編集也文裕所考或未確乎
至靖難之舉不平之氣遍於海宇文皇借文墨以銷
壘塊此實係當日本意也

附記內府刊刻書目

五倫書十二本一千七百一葉周易大全十二本一千一百十八葉書傳大全十本七百六十三葉詩傳大全十二本九百七葉春秋大全十八本一千四百五十九葉禮記大全十八本一千二百五十九葉書傳六本五百八十三葉易傳六本五百八十一葉詩傳六本三百三十五葉春秋四本四百四十葉禮記八本一千六十一葉四書大全二十本一千五百九十九葉四書集註十八本八百二十葉性理大全三

十本二千二百六十九葉資治通鑑綱目四十本四千一百葉續資治通鑑綱目十四本一千一百二十二葉少微通鑑節要二十本一千四百三十八葉資治通鑑節要續編二十本一千六百八十三葉晏宏資治通鑑綱目三十本四千二十葉文獻通考一百本一萬八百三十六葉歷代名臣奏議一百五十本九千七百二十葉歷代通鑑纂要六十本三千七百三十二葉大明會典一百四十本六千五百九十葉事文類聚一百三十本八千三百六十葉大明一統

志四十本三千一百五十葉明倫大典二十四本七百二十葉大明集禮三十六本二千四百七十六葉大學衍義補四十本三千六百葉對類十二本八百七十三葉諸司職掌三本四百二十八葉大明官制二本三百十葉大明律二本二百七葉御製大誥四本二百五十三葉御製文集八本七百十三葉御製詩集二本八十四葉洪武正韻五本五百葉經史海篇直音五本五百十二葉韻府羣玉十本一千四十葉玉篇二本三百十五葉廣韻二本二百五十五葉

詩韻釋義二本一百五十八葉經書音釋二本一百七葉詩學大成十四本一千葉四書白文六本三百十二葉許氏說文八本六百五十葉爾雅埤雅四本三百九十七葉孔子家語三本一百四十四葉呂真人文集二本二百四十葉列女傳三本一百二十五葉通書大全八本九百九十葉大明仁孝皇后勸善書十本八百七十六葉神課金口訣二本二百四十葉選擇歷書二本二百五十六葉臞仙肘後神樞二本一百七十八葉三國志通俗演義二十四本二千

一百五十葉雅興樂府二十本一千七百五十三葉
 貞觀政要六本三百七十葉歷代臣鑑十本五百六
 十葉聖學心法四本三百十五葉居家必用十本八
 百八十葉飲膳正要三本一百七十五葉釋文三註
 千字文一本七十一葉蒙求一本一百四十五葉胡
 曾詩一本九十九葉唐賢三體詩二本一百七十二
 葉古文精粹二本二百五十六葉李白詩四本三百
 六葉高皇后傳一本四十七葉女訓一本四十九葉
 內訓一本五十葉

以上三種共一帙日傳訓同函 尚書孝經大學中

唐五本三百三十六葉選詩補註三本三百十二葉
 唐詩鼓吹五本二百六十六葉周易占法二本二百
 四十葉草堂詩餘二本一百九十葉獻皇帝恩紀合
 春堂詩餘二本二百四十葉小四書三本二百四十
 葉明心寶鑑二本一百十五葉擊壤集四本三百五
 十葉勸忍百箴四本三百葉古文真寶四本三百九
 十一葉醫要集六本二百八十葉草韻辨體六本二
 百七十葉增定華夷譯語十一本一千七百八葉評
 史心見六本三百五十葉通鑑博論三本二百九十

葉證類本草十本一千三百四十五葉皇明祖訓一
本五十葉祖訓條章一本十二葉皇明典禮一本九
十五葉洪武禮制一本八十二葉御製洪範篇序一
本三十葉稽古定制一本十九葉慈聖宣文皇太后
女鑒一本六十九葉鄭氏女孝經一本四十二葉又
女訓內訓同前曹大家女誡一本十六葉內則詩一
本六十二葉內令一本十二葉昭鑒錄一本五十二
葉勤政要典一本七十三葉外戚事鑒一本六十八
葉山居四夢一本八十三葉省躬錄一本七十二葉

祥異賦一本四十九葉步天歌一本八葉傳心妙訣
一本四十五葉詳明算法一本一百十葉草字碎金
一本九十二葉真字碎金一本九十二葉千家姓一
本五十九葉孝順事實一本二百九十二葉爲善陰
騭一本二百七十二葉小學書解一本一百六葉忠
經一本四十二葉孝經大義一本四十三葉歷代紀
年一本三十六葉四時歌曲一本十一葉隨機應化
錄一本六十葉高皇帝道德經解一本六十九葉達
建字孝經一本四十二葉醫按經一本三十二葉蒙

求白文一本二十九葉山歌一本四葉華夷譯語一本八十八葉古字便覽一本五十二葉八行遺事集一本二十八葉警世編一本三十葉忠經直解一本十六葉太上感應靈篇一本九十二葉憲綱一本五十葉百家姓一本十葉千字文一本十七葉孝經一本十六葉大學一本三十六葉中庸一本五十六葉千家詩一本四十四葉神童詩一本十二葉四書雜字一本十二葉七言雜字一本十三葉三字經一本二十六葉啓蒙集一本四十葉啓蒙書法卽永字八

法一本二十一葉草訣百韻一本十四葉草訣百韻歌三本四十葉八行圖說一本四十一葉孝經直解一本三十三葉周公解夢書大全二本七十葉四書直解二十六本一千八百四十葉書經直解十三本八百二十葉通鑑直解二十五本一千四百二葉帝鑑圖說六本三百五十六葉洪武正韻玉鍵二本一百三十葉其餘釋道書不載

古香齋鑒賞袖珍春明夢餘錄卷之十二

在元朝皇朝...

順德羅兆駒初校
南海孔昭熙再校
南海孔昭榮三校



百三十卷共八冊...
卷一...
卷二...
卷三...
卷四...
卷五...
卷六...
卷七...
卷八...
卷九...
卷十...

